

四庫全書

集部

欽定四庫全書

集部

青山集卷八七

詳校官庶吉士臣初齋齡  
主事臣呂雲棟覆勘

賜錄貢生臣王  
穀

欽定四庫全書

青山集卷七

元 趙文 撰

古體詩

上之回

焉

武帝元封初因之雍遂通回中道後數遊幸

動皇輿回中道龍爲驅虎爲導樂蕃釐祠雍後息甘泉  
飲天酒澹穆清冰熱惱四夷服咸稽首臣三祝皇萬壽

石留

古樂府  
無解題

江流湯湯日夜不休瞿塘灔澦屹然不流人心人心反覆難任昨日朱絲琴今日白頭吟望夫石留到今

邯鄲才人嫁爲廝養卒婦

鴛鴦異野鷺鳳凰非山鷄物生各有偶非偶不並棲昔爲叢臺人今爲園者妻亦知久當棄無乃太不齊同時歌舞人何異玉與泥失身已至斯違天將安歸俛首祇自羞有聲不敢啼何緣夢到君王側徹夜不眠聞馬嘶

遠如期

遠如期近可知如何咫尺間朝之所約夕背之千言萬語托死生轉眼已若行路人問之何遽至如許往往或起秋毫爭財利誠已重仁義誠已輕昨日弟與兄今日胡與秦遠如期古來惟是山陽范巨卿

陌上桑

采采陌上桑採之不盈筐云何不盈筐歡子在中腸車馬從何來云是大國王呼妾欲共載恐惕涕沾裳君民

分固嚴敢亂夫婦綱有罪妾當誅寧當薦匡牀夫君即  
我天豈必侍中郎再拜前致詞蠶饑采桑忙王其早還  
宮宮中多艷妝

秋胡行

五日伉儷情五年離別腸歸舍不數武少忍庸何傷如  
何甘肯費乃作犯禮償桑者不有躬何以奉高堂穢行  
誠已醜寧復可同牀濯之清冷淵死之留芬芳念姑詎  
忍別引決涕霑裳寄言後來者好事懷金郎

勾踐夫人歌

勾踐入臣于吳夫人哭而歌有妻衣褐兮爲  
婢夫去冕兮爲奴之語

君爲王我爲后結髮相從期白首君爲奴我爲婢人間  
反覆何容易爲婢不離家爲奴去適吳死生未可測離  
別在斯須君謂妾勿悲忍恥乃良圖自憐兒女情能不  
啼烏烏仰看庭前樹一歲一榮枯與君若有重榮日復  
夕未可棄褕翟

# 河之水

河之水深復深舟以濟猶難堪被髮之叟狂不可鍼豈無一壺水力難任與公同匡牀恨不挽公襟亂流欲渡直下千尋我泣眼爲枯我哭聲爲瘡投身以從公豈不畏胥沉同歸尚可忍獨生亦難禁公死狂妾死心蛟龍食骨有時盡惟有妾心無古今河之水深復深

# 上陵

漢章帝元和三年自作爲上陵食舉

上古陵古陵無可上苔雨繡滋草煙悽愴鵠鶴鳴荒林  
狐狸穴空廣豐碑去梁何處津堅周作竈誰家煬不如  
東鄰一抔土樵牧侵陵白官府

昭君詞

琴操載昭君夔王穰女端正閑麗穰獻於元  
帝帝不幸積五六年每遊後宮常怨不出後  
單于遣使朝帝宴之召後宮昭君盛飾至帝  
問欲以一女使單于能者往昭君越席願往

時單于使在旁帝驚恨不及昭君至單于大  
悅以漢厚我報漢珍寶昭君恨帝不見遇作  
怨歌單于死子世達立昭君謂之曰爲胡者  
妻母漢者更娶世達曰欲作胡昭君乃服藥  
死荆公云漢恩自淺胡自深人生樂在相知  
心蓋用琴操本意而讀者往往不察

蜀江洗妍姿萬里獻君王君王不我幸棄置何怨傷君  
王要寧胡借問誰能行女伴各懼怯畏此道路長慨然

欲自往詎忍別恩光倘於國有益尚勝死空房行行涉  
沙漠風霜落紅妝得爲胡關氏揣分已過當單于感漢  
恩邊境得安康一朝所天死掩泣涕沾裳胡俗或妻母  
何異豺與狼仰天自引決愛此夫婦綱大忠與大義二  
者俱堂堂可憐千古無人說只道琵琶能斷腸

野鷺來歌

沔水南有景升臺劉表所築表好鷺常登此  
臺歌野鷺來曲東坡作野鷺來曲宜擬表語

今云嗟爾公子歸無勞使鷹可呼亦凡曹此  
非表語也

野鷹來高臺下天寒鳥死狐兔伏枯稍啄雪何爲者宜  
城有酒煦爾寒格高講暖肉不乾終日臂爾夜宿安野  
鷹來山中忍饑良獨難天陰日落雪模糊有虎有虎雄  
當塗兩猿不飽睨我離鷹不來將奈何

當塗魏也  
兩猿紹術

丁督護曲

丁督護鳥我行去時馬上郎今作野外殤男兒肯斷頭

婦女肯斷腸

丁督護聽我語欲從君臂不羽嫁時所結髮剪之隨君去

丁督護念我苦未亡人殤鬼婦古若無銜冤乾坤無風雨

法壽樂歌

古詩未始道佛事梁武帝即位後更造新聲  
帝自爲之詞帝既篤敬佛法又制善哉天樂

天勸天道仙道神王龍王滅過惡除愛水斷  
苦輪等十篇名爲正樂皆述佛法又有法樂  
童子伎童子倚歌梵唄今所謂金利佛法壽  
樂歌皆所自出也

西雲垂天飛流黃寶鬘百萬隨風揚帝居摩醯首羅鄉  
采女如花侍帝旁珠啼玉唾天花香澹然神情無世妝  
下視邢尹紛醒狂梵唄琅琅出清吭天庖供饌薦豆觴  
帝飲食之壽以康恒沙世界俱來王天王神聖臣忠良

春風萬里酣耕桑雨滴可數海可量無有能知法壽長  
梵天釋帝萬億歲歲歲壽杯天下醉

雙鴈吟

雲間有雙鴈弋者欲炙之鴈飛向南去雖有矰繳將安  
施山川悠遠霜霰苦可憐宿食不得時一鴈中道死一  
鴈忍痛鳴且飛黃雲落日天地瘦惟有影與形相隨歸  
來故巢亦已毀朝吟夕怨欲訴誰千古萬古多別離唯  
有死者何當歸嗚呼物生有情盍俱死莫令後死空嗚

悲

前有一尊酒

前有一尊酒有酒即無愁吾評儀狄功端與神禹侔微  
禹吾其魚微狄吾其囚人生十九不如意一醉之外安  
所求古來何國非亡社古來何人不荒丘沉思痛至骨  
賴爾可銷憂尊中有酒無酒乃休飲多作病酒不可讎

采芝

晨登屋後山采采山上芝可憐松上雨滴滴沾我衣盈

筐頗磊落滿意持之歸童子見我來拍手共笑之薄者  
實殺人蕩蕩光陸離厚者不能光食之有餘滋我感童  
子言歎息成漣渢古來用人者或以薄見奇一時誤采  
取後悔那可追乃知古人智不似童子癡

黃西有以清江李侯書來袁見招不果就既去  
西有五十韻見寄次其韻

地僻谷自淳此世有羲軒行攜二三子讀書秋樹根不  
擬山水窟忽枉君侯轎攜持貴人意僕口不憚煩居然  
欽定四庫全書

寒谷底暖以扶桑瞰是時花正濃主客共清樽欣聞結  
駟盛下賚窮巷原恍如神仙人謁入晉賀元舊谷雖可  
記白髮各已拚細論別來事感愴將何言愁予守破研  
石田疲老健羨君行萬里天宇橫孤騫唯思山林寂頗  
厭朝市喧夔州華髮女欲嫁誰能昏堂堂李元禮今代  
真龍門胸中有人物犖然剖籬藩好春播伊耆神火驚  
陸渾詞章軼唐人天馬出大宛翰墨掩晉代鳳翥龍蛇  
奔如何肯下顧草間麋與猿殷勤遠贈我一紙春風痕

空中實自愧在上安敢援坐對大將軍有蟲不得捫豈  
不念長饑終恐成素殮故人有宿諾未敢覆手翻泣然  
還明珠甘此煙雨村寄謝河陽公敢當石與溫願公茂  
功業南國資于蕃行當從公歸來繡相府尊嗟我與夫  
子結契在仍昆新知猶可樂宿好況彌敦中腸未抒寫  
別涕已潺湲行行一尊酒相送玉溪源自從別君來夜  
瞻太微垣可憐一寸心搖搖風中幡采采澗邊蒲欲扣  
黃堂闔行窺溟渤大詎止雲夢吞省穡不堪用愧我小

國繁奈何疲津梁卧病守一墩欲往未可必歎息誰與論大哉天地德六合回春暄向來作詩禍蕩滌從此番永言結我舌有如啖鉛礬高居遠俗氛靜坐收驚魂皇仁義塗自茲改乘轍願君篤久要好語時溫存借君千頃波清我汎濫袁飽讀古人書仰酬明主恩諸公盡蕭曹二皓自綺園來詩豈可和什襲傳兒孫

次韻張天從

文字於吾身有如病枝指晚思逃天刑日自參佛體近

雖迫老病頗已了生死吾猶說故吾我已覺今是卿雲  
從天來五色光透紙斯文亦厭老此事盡遜子好秋行  
當中明月照白水誰能訪窮山詩酒相料理惟當吟君  
詩永夜對明視

次韻劉耘廬

江南有故事極熟介秋夏空齋得幽景衆綠天所畫對  
景愜余情談文及茲暇山風吹池月不似城中夜百年  
易過花萬事庶生蕉羲和如走馬疾急不可鞭何妨奴

嚴光詎肯吏侯霸一笑且披襟新涼自無價

次韻歐陽良有高山仰止四首

少年場屋心富貴輕秋毫如何此幅仄晚作空山逃世  
方馳逐好我獨儒書豪寧甘往教遠不肯十上勞尚持  
鵠鷄弦自愛鳳尾槽紛然涼州曲誰賞鬱輪袍取之衆  
棄中君眼亦已高情哉君更窮相看兩蕭騷

我攜二三子行此白玉灣案頭左章集古語留人間我  
昔識此士風雨滿空山憂愁送日月不復記容顏自從

一別來乃此再見慳爲客使同邑造物何其儂豈無城  
府意乘馬忽復班還能顧寂寞山路披荒苔

新詩日以多古意日以往我欲求玄珠未易覓象罔中  
道良獨難執玉迷俯仰索居無誰語掩卷起遐想當求  
古人知何用世俗賞意到亦偶然深刻戒斯鞅惟堪自  
娛戲非欲互標榜唐公謬見推薛侯詎宜長

世變如江河不知何時止芸芸生其間有如赴海水乾  
坤一大龐歲月等流矢公言信可感流輩乃爾耳古來

文章家傳者十數子磨滅十八九誰復知姓氏要爲不  
朽計聖賢事在已勗哉立其心食魚何必鯉

香逕分韻得江字

一亭寒碧中四面空無牕種荷未有花清意已滿腔小  
坐梅樹下我亦清油幢晚來蟬聲歇靜境熟自降清風  
與明月造物無對椿閑者恣吟取如瓢分大江欲歸尚  
未肯雨濕烟鐘撞

行行江水邊

朝行江水邊莫行江水邊乍與江水別江水復在前江  
水勝人心相隨何纏綿相隨何纏綿幸勿鳴悲煎我悲  
爲我弟君悲亦胡然

雨行五嶺下

天地忽晝晦四山潑墨濃而我行其間宛如所翁龍大  
風吹倒人欲避無所容有翼不得張狂走急雨中數里  
乃一息如出鯀人宮老樹道邊拜疑我行雨工過午上  
五嶺攀緣入青空仰視萬山巔有氣如炊籠下視田間

白云此鋤田農茲行豈不苦奇觀亦已雄惜哉如此山  
不與曉景逢不曉韓吏部登華哭途窮

銅雀瓦

曹公築銅臺氣力雄九有伊嚶到香履千古開笑口猶  
餘當時瓦作硯傳不朽涪翁所珍惜又復落吾手鬼奪  
與客偷任運不汝守可憐臺上人不如此瓦壽

抵豫章

泊舟豫章城黑潦滿道周街衢未改昔故舊罕所留行

投學子廬假榻得小休燈前作家書豈爲兒女謀戒之  
築土室弟骨至則收茫茫念三年此骨知在不置書就  
我寢泣然淚雙流

倚樹三歎息

煌煌天上星墮地化爲石回思天宮勝再上那可得壹  
鬱將誰言猶能事文墨一落秦王手已是不完璧秋風  
吹我衣倚樹三歎息

白水初程

天公大惡處妬我喜晴詩當與妻子別急雨紛交馳小  
孫送我行屢止不肯歸老夫骨肉情能不酸且悲日暮  
投歷山倦極不得棲故人情義重杯酒煦嫗之老友亦  
適至良會非所期人生孰非夢此夢亦已奇我倦欲先  
睡徑與主人辭

入分宜界

上嶺或如輿下嶺復如拜是程多泥塗拄杖端足賴脫  
屨去泥淖停車觀水械偶然得一笑更以苦爲快田水

終夜鳴江浪怒澎湃聽之不能睡摩足了詩債

得蓮子

休休得一閑杯酒聊從容晚涼過池亭受用水上風默存即實境身在蓮花中何況青青盤磊落堆蓮蓬乍休吟風蟬又起聒夜蟲乃知天機動來來無終窮如何二三子不肯勤其躬無已思太康明當勵新功

寄彭宏濟

夜枕苦展轉午睡清且安萬事有乘除滿意良獨難貧

居鮮來客兒女自團園書聲雜紡響聒耳亦足歡念我  
素心友詩盟久已寒向來適邂逅杯酒語夜闌如何同  
所舍聚散如沙搏百年盡偶爾棄置何足歎

喜晴

行行復行行晴日端可愛全勝牆隈老僅得暖肩背欣  
欣田間麥亦與人意會乃知天地間生意浩如海

去者日以疎

去者日以疎留者日以老沉憂能傷人玄髮坐成皓人

生固應爾要亦何太早攜持玉雪姿故敢棄遠道蒼天  
行悠悠白日照杲杲安得以妾脇化作君墓草

至白水主人飲至海棠下花已離披

昨日泥中人今日花下客即時一杯酒已勝風雨黑我  
來後花時不及穠艷色生與天作花已是花命厄嚮齒  
與墮溷要亦隨所適誰能長腴紅而不變衰白惟應感  
流光有酒日鼓瑟

聽請道人念佛

平生不喜佛喜聽念佛聲大都止六字三誦有餘音唱  
偈類哀切和聲等低平蟬聯未肯已綿弱殆不勝饒息  
僅相屬柔吭時一鳴聽茲頽闌韻生我寂滅情坐令喧  
競中便欲無所爭乃知象教意妙覺在聲聞俗人不解  
此梵教雜歌行敲鍾鼓笛奏真與鄭衛并能令婦女悅  
未必佛者聽

早禾田

雨雨不肯止倒瀉春江濤可憐龍公苦甚我行路勞長

陂不可涉攀嶺如猿猱忽然出夷曠行人何滔滔館定  
訪我友醉我軟脚醪翻思昨暮秋有酒安可逃諸少森  
玉立俊秀非兒曹示我近所作亦復吹其毛人生有乘  
除理不差秋毫豈非昨者厄故有今者遭歸來弛然卧  
夢中亦陶陶

別朝祐

又與我友別獨與我子俱念彼歸舟疾眠食今何如愁  
懷不可遣賴有牀頭書曲江江上人搖舟來賣魚亦有

妻與子一飽便有餘我生不如子多憂化其鬚

銅雀臺

朝望西陵墓夕望西陵墓望望不復歸月朔又十五月  
朔十五可奈何更對空帷作歌舞銅雀昂然飛不去當  
時美人髮垂素我生不如陵上樹年年樹根穿入土

曉行

籃輿拂清露亦有山花香平生懶早起催盥方倒裳不  
知九州曉有此清風涼

團扇歌

私夜必見汚葛屨必遭踐生世不爲男托身况微賤悲  
痛只在心憔悴更障面出入懷袖中美郎白團扇

枕上聞大風

夢中顛風搖夢魂老夫起坐心未平樹枝上下覺山動  
牕戶開闔疑鬼行魚龍翻空江海怒虎豹入叢道路清  
溪頭梅花無恙否爲子展轉難爲情

海山圖二首

棧道繁紜如蜀路我夢曾遊定何處金碧樓臺縹渺裏  
負嶠方壺如是爾彼何人者欲問之翩然抱琴過橋底  
嵯峨石壁不可梯列仙之癯實居之下視茫茫渺何許  
風帆浪舶多積貯舟中賈客莫浪喜山上高人解笑汝

雪

三更星月寒炯炯四更霜風吹斷梗曉來宇宙忽成空  
萬里天河墮無影人間世界積滓穢化作太清無色境  
天上何人巧戲劇笑我癡眠方怯冷溪頭梅花老於我

臥樹生鱗欲誰省飲羔金帳非我事煎水何妨試雙井  
眼前清致不可辜諸公白戰續清潁

別白水歸大雪

冰枝壓路不可行健夫快斧聲丁丁南山未得過車道  
北山復作發屋聲低枝叢薄亦可喜但覺身過琉璃城  
山高路滑凜欲跌拄杖賴有青童君平安度嶺笑相賀  
滑拙快煖胭脂春夜投野店且熟睡明日陰晴明日事

行雪

夜寒枕席跳霰珠夜深我睡霰亦無未晨僕起索炊火  
怪見滿地瓊瑤鋪我行至此不得止但倚紅酒爲先驅  
路逢十店九閉戶苦寒正自無薪芻終然著地即化去  
造物何用勞工夫前山欲融未融處玉龍浮動青珊瑚  
藤梢竹刺時點綴寒食野花棲路隅小車行雪真有益  
平生看畫無此筆

伏虎嶺殘雪

晴得一霜晴更穩飽飯不怕伏虎嶺山高積雪凍猶在

昨日空驚雪畫本日烘高樹玉槎牙時有冰花墮無影  
紛紛垂絲白海棠得冷時能畧蘇醒可怪此君大曲折  
向人雅拜欲求拯擁袍公子亦吟雪豈識山中有此景  
笪橋燭下寫詩成一尊獨酌誰能省

題畫蟲鳥

泥行郭索其神全枯枝獨抱吟風仙細腰追逐相後先  
畫眉雙棲鬪蟬娟一鳴一止俱自然老猴如鬼踞石邊  
遊蜂何爲過其前水禽伺魚雙眼穿久而無得倦欲眠

鸚之鵠之高樹巔俯視螳臂爲垂涎之蟲不作名利牽  
飲啄之外何所便人生擾擾真可憐笑談對面森戈鋌  
王侯螻蟻俱埃煙大年未可笑小年世間唯有蟲能天  
次韻郭梅邊湯孤松見寄

杜門却掃馮敬通何人載酒暖此翁晝長書罷啼鳥寂  
山水似我清而窮山僧攜來兩詩卷筆勢迅疾如追鋒  
漁歌風斷郭功父碧雲暮合湯休公寒梅自照太古雪  
孤松壓倒妖春紅一時見此光怪物丈室忽換化人宮

近者重遊寶林寺山行小辟炎毒攻唱酬坐覺山鬼泣  
談笑不知酒海空當時分韻十五客冠童亦有童非童  
惜哉梅松不在眼自與脩竹爲吾宗傳聞淨覺更殊勝  
極欲往求三日龍聾補天久已付昨夢面壁更欲收奇功  
百年金碧亦塵土須有好語留山中山中道人許我否  
飽飯摩腹聽松風

題耆英圖

耆英會上十三人當時世道如初春洛陽牡丹非昔比

妖怪百出年年新我見此圖淚如雨諸老翩然過何許  
何時夢見洛陽春鄭公挿花潞公舞

食魚江水邊

食魚江水邊投骨江水中衆魚逐其腴踴躍以相從所  
得僅濡沫滿意如遊龍焉知此棄骨與爾類本同人間  
網羅多江海不得容小魚得骨莫浪喜且可慎汝出入

蹤

三香圖

梅花瘦而貞霜磨雪折骨愈寄山礬清而野桃李場中  
不肯移梅也似伯夷礬也似叔齊水僂大似孤竹之中  
子不瘦不野含仙姿人生但願水僂福梅兄礬弟真難  
爲

揚州后土廟瓊花香如蓮花落不著地丙子一  
夕大雷雨失花所在相傳以爲上天云

朔風吹沙淮浪白二十四橋沉冷月顛雷夜半撼蕪城  
雪萼瓊絲破空碧金餅歲歲獻君王玉罌泛酒蓮花香

明光殿閉沙漠遠人自無情花斷腸落藥飛天識天路  
何如拔樹飛昇去唐昌遊女再歸來城中只賣瓊花露  
江南俘客吟如叫想像裁詞不成調天宮夜宴按霓裳  
玉女擎花紫皇笑

明皇遊月宮歌

鐵龍一擲九萬里銀橋冉冉行秋水霓裳不是世間音  
只有嫦娥似妃子恍然一夢酒初醒依然玉座雲母屏  
明朝寫出天上曲却笑羯鼓羊皮腥人間萬事如秋草

離別苦多歡樂少崎嶇萬里錦官城此身曾作銀橋行

西江柳氏月江詩

何人種此玻璃橘掛在空高寒露濕秋風吹墮清冷中  
驚殺神鬢夜深蟄鈎鉤潭中豈無月冷光長照衰羈泣  
何如阿孫屋頭月時時投取杯中吸吸餘吐向筆墨間  
紙上淋漓流月汁前年刲火到詩屋月走江寒燒不及  
青山夜起繞皆山滿地蘆花不堪拾何時短棹釣西江  
雪寒一夜無蓑笠

金定四庫全書  
卷七  
羅稚川善畫作此贈之

吾觀天地間一一皆是畫與詩渝川有二羅畫得天地之英奇大羅詩名撼湖海小羅天機勃鬱不得已而水墨之搖毫造化已破碎灑墨元氣爲淋漓嗟余老眼得一見以手摶摸心然疑問君自古畫有幾君今此畫師者誰君言我以眼爲手天地萬物皆吾師吾能得其意與理貌取色相特其皮畫成正未知似否人人有眼誰可欺譬言之禪宗要透脫戀戀祖佛寧非癡作詩點出未

來眼一掃徐熙與郭熙

相撲兒

一兒攀肩猿上枝一兒接臂倒立之立者忽作踞地伏  
攀者引頭立其足飛跳倏忽何輕翾憐爾骨節柔如綿  
少年屈折支體軟紅錦纏頭酒論枕此兒巧捷未足稱  
江南何限無骨人

網戶歎

江南西風粳稻熟網夫出門網婦哭天晴黃雀飛苦高

縣吏椎門怒震屋哨聲飛空健鶻過遲速小誤成蹉跎  
君庖不充將奈何

獵戶歎

江南冬前蟲未蟄獵師篝火熏穴急山中玉面何處藏  
供奉期程如束濕茅簷十日無炊米蓬鬢鴉衣瘠如鬼  
但教得狸何顧爾易牙奉君尚烹子

越婦採葛苦

采采山上葛攀藤步巖幽上山逢虎狼下山逢獮猴歸

來締綸之藕絲香且柔織成一片雲精絕鬼工愁入笥  
獻君王貢職民當修君王不自惜持以奉仇讎西施被  
服之俱是越國尤吳王抵掌笑於越吾何憂飛書益封  
地謂越吾諸侯嗟爾采葛伴辛苦勿嘆愁天道有乘除  
苦極行當休吳王沉醉姑蘇上半夜不知吳國秋

陳清叔晚菊

物生何用出世早春風紅紫今枯槁東籬瀟灑一枝秋  
向來埋沒不如草人生涉世亦如此風雪林中要耐老

陳君臞然一寒素清絕誰如叔也好十年竟被先疇役  
大袖高冠反顛倒黃金白璧盡辭去獨與寒花澹相保  
問君對菊何所得租藉半空詩富藁百年芳臭終不歇  
一時泯滅豈足道君不見淵明對菊無一錢千古詩名  
塞穹昊

贈長沙譚存心

譚君酒狂一筆萬字不可當嗟哉胡爲乎不自貴重也  
而狂我知君狂不得已欲倚杯酒呵蒼蒼蒼蒼不識君

我識知君胸有光怪物問君今年其歲幾四十一矣無  
何仕光陰誕謾不可恃我昔行年亦如此相逢一醉令  
公喜解劍傾囷無壯士一簪獨行風雨裏老人夜醉誰  
汝止丈夫得志行所爲窮即低頭教童子嗟哉乾坤如  
此而已矣歸來歸來歸來是

生日客朱溪主人云今年乃青山真生日也感  
其語作詩自壽

人生難得真生日正使百年才遇一我今客裏值斯時

況復主人相欵密連宵舉酒爲我壽滿眼雞豚破梨栗  
壽牋投贈盛賓友壽觴拜舞羅弟姪假令家居那有此  
米鹽紛糾費爬櫛去年閩山收弟骨日夜悲啼吟蟋蟀  
歲晚方能負骨歸此願已償甘似蜜平生苦遭兒女累  
十年求解如沐漆今年二子各成婚坐着明年婚嫁畢  
雲邊太史相邂逅許我行年七十七蓋棺以前日一詩  
萬首猶堪劍南匹未知先生竟肯否不肯便問天公乞

雷震漁所之柱

瞥然滿屋飛金蛇  
樓東樓西號火鴉  
天鼓百面一手搗  
百年老柱神斧加  
婦女驚倒兒童哇  
知君把釣江頭沙  
明珠赤手龍領擎  
天翁發怒爲此耶  
向來五鬼千夜叉  
寒我饑我生眼花  
捧頭驚竄如磨麌  
從此不作窮詩家

銅雀硯

老瞞智計籠天下歌舞未終銅雀夜可憐用破一生心  
不及當時臺上瓦屑金作瓦費精神那知身後旋成塵  
流傳千百僅一二付與所不知何人快閣仙人諛墓得

品題更費東坡墨研磨辛苦政未休憐爾何年返真宅  
摩挲歲月白髮生建安七子俱彫零安得春醪三萬斛  
醉來快寫短歌行

劉陽卜氏耕樂堂

君當學君家君子儒西河之上可以老諸侯端拜爲師  
模君莫學君家老中郎河南田畜豈不好上林要牧天  
子羊祇今樂莫如耕樂悔我從初不曾學作勞自可操  
豚蹄舊讀何妨掛牛角慎勿思成湯聘幣起幡然伊尹

當年已大錯

題畫

雲巢草蟲十有七我言蜂蟻非蟲匹我見二蟲常敬之  
爲有君臣天所秩江南此蟲久已無煩君翦取贈老夫

李士宏得鄉林五老石於野人

鄉林醜石何曾醜化爲五老如此壽高低俯仰各有意  
清潤堅貞皆可友剗剗刻削巧戲劇誰烏此者鴻蒙叟  
銅盆古雅出高麗玉筋清奇原史籀向翁神遊渺何許

此物亦落何人手野人得之安所用光怪出屋驚田婦  
天生尤物必有屬詩老得之端不偶不須拄杖穿寒雲  
几案之間有盧阜先生自是五山一視真盧阜猶培塿  
如何得此亦驚喜便欲賦詩爲不朽醉僧癡望作怪供  
持此或可博升斗壺中九華竟不得坡老歎息不離口  
仇池不借王駢馬詩卷紛紛愁逆取達人着想亦未免  
何異兒童貪餅糗蛾眉山高隔雲霧此物今知屬誰某  
世間奇寶雖可玩鬼奪客偷誰使守先生一笑付偶然

吾欲藏之無何有

麥熟

今年麥熟亦可喜紫石霏霏落鍾乳我從田家慣餅餌  
夢想風味今未已箬葉浮浮捲牛舌甕甌泛泛割龍耳  
一丸蘿蔔吾豈無悲歌不怕紅娘子詩成不滿貴公笑  
書生豈識餅十字

彭海月北遊

夢跨海風出埃塈萬頃瓊瑤雙履踏四無畔岸水連天

雨枕琉璃自相合當時我外更無人仙聖往來班雜還  
恍然夢覺失清遊正似明珠埋蚌蛤十年對月心自拜  
江南沙土老額塌羨君持月海天遊萬里乾坤雲一匝  
乘槎徑到斗牛間細語星辰相問答知君此行有奇遇  
直挾星書扣闔閨羣仙若問青山人白髮秋深坐蕭颯

欽定四庫全書

青山集卷八

元 趙文 撰

近體詩

元夕陪須溪野廟觀燈

豈能狂落魄只似醉瞢騰媼拜兒看笑蠻粧鬼見憎客  
中猶有酒亂後此看燈攜手沙河路前身夢裏曾

次分宜

分得宜春地東偏一盡屏洪陽仙洞古龍姥故祠靈雨

遇溪痕長春回草意青道傍聊下馬剔蘚讀碑銘

賀一年年

總角坐成老孤生自可憐遂爲衆父父又賀一年年桃板無新語屠蘇妨早眠柴門無可掩來者自蕭然

哭蕭漁所

於佛曾聞法因詩遂得貧若爲三尺喙不了百年身在昔玄真子如今主水神飯餘茶又熟不學淚沾巾漁所且死

見有邀爲  
水部神者

哭張文翁同舍

豈意渴相如俄爲化子輿平生一杯酒活計百篇書同  
舍遂欲盡吾生不願餘如今念夫子痛飲未全疎  
扶上竹車去知無再見期誰能逃數定不必恨歸遲白  
髮扶棺母青年上學兒亂來朋友少灑血一題詩

尋郭道士不遇

問師云已出杖履水東灣世上方多事山中亦小閑竹  
光新雨後禽語夕陽間自出雲關去鐘聲送我還

紀夢

至南劍宿州致知齋明日訪簿尉墓是夜從者胡睡而魘問之云夢一白衣人將一白衣少年入齋房吾據案觀書少年再拜無言而出我寤猶見其出也故驚時深卧足下蹴深告之深恨曰我方夢驚我問何夢亦夢一年深衣入拜我其少年亦無言而出深不識叔言狀頗相類

既不夢于我胡然無一言形容那可認骨髮想俱存淚  
盡血猶滴霧開山尚昏相看憐稚子老病莫銷魂

元日

又見王正改舊年此生此去幾新元自無賓客來看歲  
不遣兒童苦閉門雨帶癡寒禁草色雪吹殘片上鬚根  
小孫未省人間事尚擬今宵守歲樽

二月十四夜夢中吟云隔溪啼鳥東風軟滿地  
落花春雨深次日陪謝少府飲章聖寺足成之

留得餘寒伴客食  
暮然萬感赴沉吟  
隔溪啼鳥東風軟  
滿地落花春雨深  
草草一樽聊若下  
匆匆千載亦山陰  
月溪橋上凭欄久  
應有游僊識此心

雨過

雨過山田物物穰  
齊庖煮豆喜初嘗  
茸茸綠莢牛毛淺  
戢戢明珠蚌蛤長  
不直畫堂擎玉腕  
只宜吟客飽藜腸  
食餘依舊堆盤在  
貴賤同歸何有鄉

哭丁千崖教授

一覽樓頭笑拂衣今朝何意此歎歎斷無痛飲歌都護  
那得重歸見令威太學廢來同舍盡清江好在故人非  
我來豈是無情者爲哭妻兒無淚揮

寄孫小隱

恰似東山不見時我懷如此更能詩傳聞薦表雖無驗  
感激修塗獨見思渝水微茫蓬島外秋風浩蕩菊花期  
別來殘錦何堪寄羞示孫郎帳下兒

寄歐陽振仲

晚客他州只鳥飢無人可與話心期  
前生一念有今日投老相逢復幾時  
頭白可知天下事秋深定有客中詩  
何當細語梅花下眼底故人今在誰

次韻文以正

家住荒寒野水濱老來無處避風塵  
裸人至境有不裸臣族幸然非亂臣  
鬚影半因憂世白眉端時鳥得詩伸  
盛衰物理煩君看舊日錢神今更神

次韻趙韞玉

坐擁寒爐酒入肌偶然談笑勝於詩空齋着雨更愁絕  
往事如雲勞夢思歲月只供吾輩老經綸不了古人癡  
狂來欲碎瓊壺起忽憶殘鐘禁夜時

次韻友人

相逢小坐芷花秋絕勝揚鞭并與幽世上十年塵轉海  
人生萬事博懸投當時對酒曾辭酒今日言愁始欲愁  
何不倒囊來一醉舊題重訪酒邊樓

哭文溪

滿襟和氣任天真，豈意俄成千載人。篤厚西都諸老傳  
宦游南海宰官身，竹君所幸存中子。荀氏何妨有二仁，  
早及相門今白髮。傳來哀訃倍酸辛。

憶得梅邊載酒時，梅花依舊主。君非春如生，客至誰省  
人與殘年去。不歸銅雀帳，存仙似夢金臺鴈。到客沾衣  
清朝庶政須參決，却怕除書出帝畿。

坐睡

非癡非夢小瞢騰，暝坐還同入定僧。口似汝陽狂見麴，

頭疑季子困懸繩兒來問字幾三退客苦多言彊一膺  
日日如期不相貸世情誰似爾堪憑

次韻孫小隱九日

壯老相催已久知逢秋正自不須悲向來蟻國一場夢  
此去牛山幾首詩且共黃花嬉晉晚嬾攜白髮過燕垂  
江南風景何堪說却愛新來眼着籬

聽雨

散髮欹眠困鬱蒸誰推河漢落紅塵電光照雨不可盡

霧氣滿空疑有神駕海怒潮新月夜繞山腰鼓建溪春  
此聲此景誰能寫輸與城中不寐人

和簡齋十月

已慣禁秋不用悲無情日月去如飛霜晚起風鴉自宿  
江南欲雪鴈安歸小園梅花照眼在老子鬚毛如昔非  
敗絮與官供戰卒遙憐老婦泣牛衣

早過歷塘

細細清風吹月明苟與如泛夜舟行草根帶露有蟲語

茅屋閉門唯犬聲鬼燐影寒驚遠去曜靈睡起亦東征  
踏車田父莫嗟怨如此早涼誰與爭

海棠

纖纖光潤態偏濃曲曲花蓬暖自融嬌淚惱公初着雨  
豐肌病酒不宜風人疑欲睡高燒燭天悔無香剩與紅  
正使吹殘亦何恨向來艷艷本空空

咏梅

我與梅花別一朞停雲倚樹鬢成絲偶于蹊路相逢處

正似故人初見時清裏有和夷惠聖寒邊帶瘦鳥郊詩  
客中無酒能消得共撥寒灰坐欲癡

歐陽時可來訪感而問之故臨別贈此

二十七年重合并舊遊回首絕堪驚世間至竟壽多辱  
造物不如君有情白苧春風留古意青燈夜雨話平生  
子由無復連牀日賴有秦黃是弟兄

、張南溟山長相邀紫極宮西雪樓登高姚南禮

言北方異書載大鵬事

寫韻亭高樓更髙百年登覽著吾曹客和月日成三九  
我與鯤鵬共一毫山吐南雲飛砲石江橫西雪湧波濤  
黃花到眼應多感不欠黃花挿鬢毛

丁酉元日示兒

新春喜見甲子日汝輩豈知丁酉科酒少亦呼鄰共飲  
家寒敢問客能過堆牀萬卷皆可飽如此一貧吾已多  
忽憶東坡戲趙叟明年六十奈君何

富水曾教授夜飲有作

心齋聽講趁諸生何意相逢曲豆城急雨狂風十年夢  
青燈白酒故人情形骸改化悲歡異歲月銷磨感慨平  
却恐斗牛驚紫氣寒爐今夜聚文星

飲袁國宗

一丈明牕便有餘四人燕坐小蓬壺可憐一月半晴雨  
未省百花今在無眼底是詩皆可賦樽中有酒不須沽  
更闌醉後便歸去賴有門生稚子扶

捕守宮

向來上陽人盡屬沙叱利長門不用守蜥蜴草間戲

○村行所見

良苗未成實綠色相交加南風虛拂之奔走如驚蛇

晨起三首

晨起出門去江聲自悲咽滿目無行人前山霧如雪

山寒日不光舉目斷人腸兒童莫問路怕是小簫簫小簫

舊鋪昔年與亦周入閩至此俱病得片紙告急丞相丞  
相以書遣醫來又二專卒六轎夫五百堵余得書喜甚

時亦周已不

甚能喜矣

三人相對眠，  
眼中各自夢。  
覺起偶開門，  
老樹綠不動。

書扇二首

明月何時掇，秋風幾日還。  
若教人不熱，敢怨我長閑。  
牆外數莖新竹，樓西一抹斜陽。  
偶遊蟻穴初覺，細聽蟬聲自涼。

睡起

小憩午熱倦如柳，睡起雨來江浪聲。  
快意百年渾似此，不須浮海覓長生。

竹枝詞

終日望君君不來爲誰猶住簷孤臺幸自一年無夢到  
誰教昨日有書回

江南女兒善踏歌桑落酒熟黃金波洗壺日日望君至  
君不來兮可奈何

聽兒童歌船作竹枝助之

田舍兒童走似麇踏歌椎鼓鬪顛狂元宵乞汝閑幾日  
元宵過後種田忙

哭亦周

去日相攜涉畏塗歸來形影自相扶倦行小憇荒山道  
怕聽深叢叫鷗鴟

堂上華顛泣欲枯哭聲那解到黃壚千般欲解却公意  
難得嘉賓一箋書

擢第君王與袍笏蓋棺丞相辨深衣江南仕宦堪車載  
如此全歸似汝稀

二十年來黍一炊英風惟有塚纍纍兒童躑躅牛羊戲

陌上行人謂此誰

皆山夜起

上田下田水曉曉南嶺北嶺蟲啁啁如此月明誰管領  
可憐滿壁海棠梢

隣家閉門月色好籬落參差殘雪中想見老農方鼾睡  
不知門外有清風

正月十四日大雪上信國公家

哭得愁雲轉不晴山風吹淚欲成冰兩年不過西州路

今日來登上馬陵

氣槩堂堂壓九州誰知零落此荒丘却煩野老編松葉  
怕有牛羊上冢頭

共出長汀恰此朝荒山露宿草蕭蕭如今踏雪來看冢  
回首當時未寂寥

十年目與腸俱斷不見延平病鴈回若不從公天上去  
定應隨我雪中來

讀史

夾寨功名節節奇門高事起更堪悲身亡家破英雄笑  
恰似伶官戲罷時

傷逝三首

昨日相扶尚自存今朝痛哭奠清尊如何一夜音容隔  
便有紛紛說夢魂

老人不哭自銷魂况復長號病眼昏終日哭聲那可聽  
一聲聲有一般言

老去真無淚可揮斷腸三十八年非忍看乳者攜孫揖

怕見親情別極歸

榕村田家

門外蕭疎竹數行小池聊可浴滄浪禾牀留向竹陰下  
兒踏田歸話晚涼

朱湖

高低擗柳綠如苔三兩柴門傍竹開此處定無人挾彈  
青青乳燕出溪來

汶歸舟中

伊伊軋軋櫓聲歇  
淒淒切切寒蛩鳴  
滿空星斗不解語  
時與漁火爭晶熒

送春

曉起裁詩擬送春  
臨池把筆意殷勤  
何人送得春曾去  
只見春風解送君

次韻感舊

人間歲月如江波  
歡樂苦少哀情多  
千曲笙簧彈不盡  
公無渡河公渡河

秋雨

秋雨沉沉酒醒遲  
小牕燈火對唐詩  
是誰隔屋鳴絃管  
恰似吳山夢覺時

燈前詠詩

青春苦留不肯住  
白髮不招還自來  
閑着燈前寫詩手  
百年端是窖中埃

愁坐

草色青青有底忙  
空齋愁坐日偏長  
一春不作看花夢

滿地苔痕煮藥香

戴嵩牛

荒草茫茫一笛風靡鳴未必牧人通歸鴉落日江南野  
何限人間真戴嵩

百牛圖

浮沉隱見各從容不借山童尺箋功一犁春雨吾事濟  
何用噴噴多牛翁

東興鋪二首

老人無淚與君啼夢裏相逢路竟迷二十三年崇勝寺  
對牀今夜是江西

老老堂前壽酒杯鄉人曾羨錦衣回那知此日還鄉處  
剩有東軒長老來

昔年二首

昔年攜汝赴閩京此日深兒尚未生今日攜兒收叔骨  
一如當日共伊行

少年如此已成枯我亦重來白鬢鬚正使冥冥有知識

不知還認阿兄無

意行

午坐如癡嬾喚茶  
意行因到野人家  
千紅萬紫隨春去  
獨立溪頭看荔花

張司空廟

式乾殿久化烟埃忠壯祠猶立水隈當日早如龍劍逝  
免將分拆累三台

兩峰睡覺

宿酒初醒喚夢回起來詩句暗敲推山童熟睡呼不應  
櫂馬乾芻風雨來

太真入宮圖二首

據太真初入宮方爲壽王妃三郎不應走馬來迎若常時自華清回首有三娘從今皆無之此當是太真嘗忤旨遣歸明皇思之使力士問焉妃剪髮以獻上惻然再召入故明皇出迎而力士前焉

未舞霓裳寶髻斜流蘇帳裏再盤鴉君王細看春風面  
終是香雲減一些

夾道千花護綵雲三郎馬上不勝情誰知繡幃深深許  
中有漁陽百萬兵

秋夜與空舟弄泉於北溪之上賦是詩

四更欲盡草露濕萬籟不鳴山月闊往往虎蹄留道上  
時時人語出林間

題郭索集

鈞輶格磔李羣玉嵬眼湏耳樊宗師人生歌哭貴適意  
閑倚秋江聽竹枝

倦極

倦極得涼意自適芒席何必殊桃笙啼鳥一聲扇墮地  
我睡已足非渠驚

禾川歸途

天亦寒凝日易曛客情黯黯似春雲不知細雨止還作

自倚籃輿看水紋

春風高

報楚彊吳一世豪屬鏤夜賜竟徒勞繁華極處能回首  
惟有春風第一高

一 酣郭書記

天將才調累君閑新領仙除記室間半夜月寒眠未得  
燈前草奏玉京山

桓溫

亦惡人言如處仲愛聞伎說似司空假饒眼耳渾相似

正恐肝腸自不同

展亦周墓

竹刺藤梢未易攀一杯紅酒醉荒營攜兒不敢高聲哭  
僧錄新來住此山

詩九首託南劍劉教尋亦周墓焚之

自出延平十八年年誰與醉荒阡若爲化得衰翁骨

去作墳中三百磚

丙子十月文山自南劍出汀葬亦周鳳山崇勝寺復復止得三百磚砌墳

舜卿墓表屹東禪却恐如今不得全崇勝山中一堆土  
故應汝骨尚依然

平生二老最憐君今日相隨在九京汝得從親吾子立  
不知誰死復誰生

如此情鍾少夢君絕疑魂斷已無魂新興道士傳消息

知共乘雲玉帝門

高沙新興觀謝道士附體亦周言文  
山今在玉帝門下我亦常與之會

說與遼東丁令威天長海闊不須歸中郎便有重還日

腸斷生妻已去幃

十八年來老眼枯只今白盡舊髭鬚假饒夢裏重相遇  
知汝猶能認我無

妻子相寬亦偶然老人何用許悲煎沉憂若解令人死  
何至相疎十八年

怕看杜老懷觀頴厭見東坡說子由每讀渠詩先掩卷  
旁人怪我淚雙流

刺血題詩寄阿儂斷腸五十五衰翁此詩到是衰翁到  
此血由來與汝同

贈山人二首

水秀山明幾百年一朝城市化荒烟朱門富貴已如此  
猶有人爭舊墓田

谷陵岸谷本何常盡是盤龍夢裏岡欲買一丘理渾沌  
却教世上再羲黃

江路聞松風

雪裏雲山玉作屏松風入耳細泠泠朝來醉著江亭酒  
却被鬚龍喚得醒

題米芾山水

遠山濃淡幾無影遠樹高低略帶行不是模糊并紙敗  
無人知是米元章

雨後

雨後臨池草色浮小樓欲上又還休兒童問我悲何事  
忽見山茶長一頭

詩餘

烏夜啼

秋興

院靜槐陰似水雨餘蟬語先秋熟殘梅子無人打金彈  
滿紅溝 又送行人歸去誰憐倦客淹留畫艤旗鼓江

南岸人倚夕陽樓

阮郎歸

梨花

冰肌玉骨淡裳衣素雲生翠枝一生不曉謫仙詩雪香  
應自知 微雨後禁烟時洗妝君莫遲東風不解惜妍  
姿吹成蝴蝶飛

又

惜春用前韻

舞紅一架欲生衣殘英辭舊枝雨聲自唱惜春詞行人  
應未知新火後薄羅時君歸何太遲鏡中失却少年  
姿年隨花共飛

蘇幕遮

春情

綠映平烟樹遠村落聲喧鳬鴈歸來晚自倚闌干舒困  
眼一榦蒲萄青得池塘滿飲先愁吟又懶幾許閑情  
百計難消遣客路不如歸夢短何況啼鵝怎不教腸斷

側犯

夜飲海棠下

恨花開盡夜深自歎臘脂顆雨過繞曲曲花蓬錦圍裏  
浮空燒蜜炬香霧霏霏墮無那倚滴滴嬌紅笑相蟬  
歌儔飲伴花底圍春坐念滿眼少年人誰更老於我歲  
歲花時洞門無鎖莫負東君酒盟詩課

石州慢

京浙塵埃閩嶠風霜不覺催老封侯事付兒曹懶把菱  
花頻照明光賦筆那知白首山中年年管領閑花草叩  
角夜漫漫問何時能曉 堪笑空有傳世千篇正似病

呻飢嘯欲傲王侯早被王侯相傲蓋棺事定即今老子  
猶龍榮枯得喪渾難料無酒不須愁問黃花知到

望海潮

次龍有章韻

雲外梅陰雨餘苔暈嫩寒初沁羅裳書几凝塵琴絲帶  
潤小牕幽夢生涼新水漲銀塘恨王孫去後烟草茫茫  
記得湖山勝處相對拆封黃情牋思墨猶香奈當時  
兩鬢都是吳霜兔顚吟枯鵠裘解盡何意此遊梁舊話  
不堪長便倩薰風吹去本地看風光惟有青山伴我耕

釣老村莊

大酺

感春

正寶香殘重簾靜飛鳥時驚花鐸沉思前夢去有當時  
老淚欲彈還閣太一宮牆菩提寺路誰管紛紛開落心  
情渾何似似琵琶馬上曉寒沙漠想箏鴈頻移釧金度  
瘦素肌清削相思無奈著重訪舊誰遣車生角暗記  
省劉郎前度杜牧三生爲何人頓乖芳約試把菱花拭  
愁來處鬢絲先覺念幽獨成荒索何日重見錯擬揚州

金定四庫全書  
卷八  
騎鶴綠陰不妨細酌

鶯啼序

春晚

東風何須紅紫又匆匆吹去最堪惜九十春光一半情  
緒聽雨到昨日看花去處如今盡是相思樹倚斜陽脉  
脉多情燕子能語自怪情懷近日頃懶憶劉郎前度  
斷橋外小院重簾那人正柳邊住問章臺青青在否芳  
信隔魂無據想行人折盡柔條滾愁成絮閑將盃酒  
苦勸羲和攬轡更少駐怎忍把芳菲容易委路春還倒

轉歸來爲君起舞寸腸萬恨何人共說十年暗灑銅仙  
淚是當時滴滴金盤露思量萬事成空只有初心英英  
未化爲土浮生似客春不憐人人更憐春暮君不見  
青樓朱閣舞女歌童零落山丘便房幽戶長門詞賦沉  
香樂府悠悠誰是知音者且綠陰多處修花譜殷勤更  
倩啼鶯傳語風光後期莫誤

又

有感

秋風又吹華髮怪流光暗度最可恨木落山空故國芳

草何處看前古興亡墮淚誰知歷歷今如古聽吳兒唱  
徹庭花又翻新譜 腸斷江南庾信最苦有何人共賦  
天又遠雲海茫茫鱗鴻似夢無據怨東風不如人意珠  
履散寶釵何許想故人月下沉吟此時誰訴 吾生已  
矣如此江山又何懷故宇不恨賦歸遲歸計大誤當時  
只合雲龍飄飄平楚男兒死耳嚶嚶昵昵丁寧賣履分  
香事又何如化作胥潮去東陵豈是無能成敗紛紛歸  
來手種瓜圃 膏殘夜久月落山寒相對耿無語恨前

此燕丹計早荆慶才疎易水衣冠總成塵土鬪鷄走狗  
呼盧蹴踘平生把臂江湖舊約何時共話連牀雨王孫  
招不歸來自采黃花醉扶山路



